

荔村草堂詩續鈔

荔村草堂詩續鈔

南海 譚宗浚 叔裕

于滇集

起光緒乙酉五月迄丁亥十二月詩一百三十九首

蒙

恩簡授雲南糧儲道五月初七日

召對養心殿恭紀

光緒乙酉夏六合咸雍熙

帝曰汝宗浚督儲西南陲

臣浚

九稽首鞠躬升

玉墀

臣

質實禱昧恐復瘵厥司

帝曰吁汝往撫挹毋固辭汝昔督蜀學聲名朕所知莘

莘縫掖輩至今口碑垂汝材實幹濟自可持旌麾臣聞
六詔地古號邛笮夷開道始武漢神駒產雄姿六朝暨
唐宋馴叛恆羈縻完顏始隸籍拓畝耕畚菑

國家大德廣文軫通滇池華顛及韶稗沐化咸娛嬉鳴
呼咸同際戶限生羈縻探丸互仇殺白刃鋒差差縣官
不敢問養癰感自貽奸民村社聚悍帥山澤貲幾成藩
鎮勢部署由偏裨

王師迅電掃鼓勢擒蛇豕手持日月鏡再燭西南維七
擒孟獲陣三豕蚩尤尸邊氓稍蘇息忭頌歌

聖涯邇來島夷狡又復窺藩籬越裳旣被給有類口由

欺邊關近合市販鬻來侏僂縱云被純績豈易防漏卮
自古馭邊吏所重清節持黃金縱如粟詎可渝素絲災
黎當拯卹猾吏當窮治羸兵當減汰遠裔當撫綏

宸衷悉厘注縷析詢無遺懸知且蘭外若戴春臺曦

玉音復垂問抵任當何時長途犯霜露谷嶺多嶮巇

臣聽

天語涕下交頰頤願捐肝腦報遑恤頂踵私馳驅萬程
驛一一皆

聖慈

臣

昔侍

禁近稠疊承

恩施誓將宣

主德鋪藻摛鴻詞勉成一代製高義述皇義上之陳情
史俾備金鑽貽下之諭愚魯刻頌同籀斯汗青苦未就
叢稿多孤離忽持繡衣斧四牡行逶迤睖睖望

紫闕喜極翻成悲菲材實驚鈍敢詡追鋒馳文章矢報
國致效惟毛錐願陳

聖功德永勒鐘鼎彝試摹出師頌并廣槃木詩

赴任滇南留別諸同人得詩六首

丹詔朝來下

九閭喬雲輝映到衡門誓盟止水

微臣

志眷念長途

聖主恩

召對時詢及
路程遠近

辛苦慣同驅踏磨
麤麤眞愧鶴乘

軒由來報稱無中外
只要心肝奉

至尊

東門祖餞黯將離
不爲顏公二始悲
絕微適當繁劇地
非材慙負

聖明時敢同王貢
彈冠慶轉悔申韓
讀律遲曾侍

帝晨趨直久終期
補闕近采恩

猶憶臚雲甫唱名
十年面壁學研京
自知褊淺難高位

私擬文章答

聖明條例甫編樊
紹述典章勤考杜
君卿而今筆研都

焚卻口意何時屬彙成

幾輩輶車候吏迎疲僮羸馬獨長征遷移豈盡

明廷意

余力辭京察而掌院不允或云同年某實媒孽其間以傾陷余也

冷暖方知世

俗情手版頭銜隨熱宦鳳池雞樹恍前生長沙賦鵬今
休歎我過長沙更卅程

拔劍悲吟感百端馳烽幾載徹且蘭朱鳶接界覬窺易

青犢連營莫定難學治未嫻勞案牘拯災無術媿饔飧

依然學舍書生樣襤被蕭條一葉寒

余不攜眷屬之任

千里雲山使節馳重勞知舊致箴規交游未易輕傾蓋

結習休教尙癖詩任嗜蝦蟆隨俗好莫題鸚鵡倚文詞

自慚榮戟非初志早晚辭榮餌紫芝

燕歌行

西風蕭颯天雨霜獨鶴夜叫鷓鴣翔思君不見徒斷腸
帶長簪短私自傷憶昔陪君白玉堂夜如何其歡未央
豆登岳高酒瀛滄迴風激盪調笙簧明月照燭羅襦瑤
自從睽別栖空房機中唧唧啼寒蠶豈無朱絃奏清商
世無知音誰得詳君如白日升扶桑普照六合騰紅芒
願鑒幽室迴清光妾人隕涕悲淋浪中宵擗摽愁難當
人生歡會安得雙君不見參商牛女遙相望

別故居詩效宋芷灣先生體

別書

少年獵文史欲讀恆無貲及乎插架滿展閱神已疲我
居輦轂下典籍供娛嬉亦時下朱墨點勘多存疑京曹
乏金玉恃此矜豪資今晨忽斥賣輦載歸賈兒然脂足
代爨易餅聊充飢平心下轉語聚散理亦宜本來非我
物放佚奚足悲君看永樂典萬帙今無遺有書不能讀
嗟嗟遠官爲

別花

我居近花窖紅紫紛葳蕤每逢市擔過拂拂香風吹干
錢恣購買種植羅階墀奚僮竊相罵此老何太癡客居

如傳舍恐復他人貽或言花悴茂亦預人興衰今年牡
丹萎遲蹇吾亦疑炎涼及草木世路吁可悲汝花亦踰
踰惜不朱門移花前歌別曲侑以黃金卮明晨視花露
厭浥如漣洏有花不能賞嗟嗟遠官爲

別酒

美酒乃天祿於官卻匪宜愛官不愛酒俗病從何醫憶
從使吳蜀供傳羅珍奇兼年累病肺杯勺安敢窺及乎
返里後輒復思朶頤乃知賦命薄官轡難充飢酒兮我
與汝遭際吁可嗤昔爲相見數今爲長別離衙齋風日
美當復時相思願言解龜去一石浮鴟夷有酒不能醉

嗟嗟遠官爲

題徐鐵孫觀察丈畫梅

冷蘂繁枝簇簇攢段家橋畔劇春寒披圖自是承平景
不似西湖劫後看

山堂百本記親栽一去殤魂碧血哀歲歲花前人酌酒
可應丁鶴果飛回

繭足長途慣苦辛對花吾亦媿風塵壯游一事差堪慰
又看唐梅萬點春

時余將
之滇

季弟書來知伯兄以四月四日病歿今已三閱月
矣人事牽迫無暇追輓舟次潞河乃和淚哭述

四章以志哀感悲慟痛切情見乎詞

人生無百年離別固其理胡爲天夢夢荼毒乃至此君
病我未詳君歿我難視天屬胡闊疏覩顏實堪恥忽憶
季春書肺病良漸已眠食雖云差龍蛇尙滿紙悲哉鬼
伯強一旦還蒿里展轉讀遺緘竊疑君未死噩耗雖有
期傳聞但妄耳悠悠望彼蒼淚下如鉛水

我生甫韶齔失恃嗟熒熒幼年苦荒旱弱冠遭夷兵提
攜賴君共跋涉恆兼程當時性跳盪豈免君怒撻倘非
守嚴誨濩落將何成微名幸一第蹶躓慚簪纓君今已
長訣胡不燕臺行想應魂魄弱未慣風濤驚哭君涕血

迸思君愁緒縈
醉君君未覺空
有壺觴傾願爲
松與柏
常得依君塋

自從春夏交精神鬱如結
嚙指恆動悲兼之肺肝熱
意謂偶耳鳴作勞應稍歇
豈知折翼祥先兆在旬月
聞君病侵尋半爲文園渴
腳氣苦蹢躅頭風遂牽掣
中庭有珠蘭順風揚芬烈
君恆醉其間長嘯或晞髮
如今君已亡觴詠定銷歇
勿觸家人悲願花恆不發
舉首懟天公
胡爲生麴蘖

迴風吹練帷燈影慘將綠
徘徊望南雲拊膺淚盈掬
當君訃到時我適膺微祿
亦思助葬歸王事苦羈束
漢人

或去官此例今難復悔不早抽簪猶能拊棺哭遙知九
京魂悲喜亦相續喜我身繡榮專城剖符竹悲我萬里
行頓遭武溪毒君會詣象岡壽藏早營卜墳前圓石文
待我徵實錄報君期千秋一瓣默遙祝

驛柳

短長亭堠半黃昏鴨綠鱗鱗一色勻飛絮尙仍過別陌
長條爭解絆征人和煙和雨都如夢輕暖輕寒不算春
曾是靈和宮殿種忍教淪落委風塵

昔年濯濯萬千枝憔悴成圍又一時合比羈魂悲馬角
敢將新樣鬪蛾眉青樓豔冶誰相妒紫塞蕭條恐不支

十載冰霜磨鍊久折腰垂手總非宜

馱鈴一路響斜陽壓酒誰家玉甕香弱質但求攀折少
遙程敢怨送迎忙江南碧埃鶯啼雨關外黃泥馬背霜
但到郵亭已腸斷况聽羌笛奏伊涼

年年榮悴道途中憐汝飄零亦斷蓬合作屏藩障北塞
肯求噓植媚東風蔭人溫比連陰樾抱病心如半死桐
爲語天涯寥寂甚幾人邂逅駐黃驄

天津道中見漕船

道光海運多浮議近始連檣涉怒濤昨苦敖倉幾斷粟
今看遼碣遞飛艘倉儲支絀司農困邊計委蛇

聖慮勞潞水客談遺法在幾時
礪礪變腴膏

留別廖澤羣編修

君是辭官我到官一尊相對共沈瀾
蒼茫不盡臨歧恨

窮達都愁避債難

余出京負債甚多不能攜眷之任

夢裏青山虛共隱

愁中白日勉加餐
萍蓬相遇知何處
恐已星星兩鬢殘

悼鵲

雙鵲巢樹巔飛飛自得所
下枝營室廬上枝蔽風雨
比來育數雛伏菹亦良苦
自許文采佳同羣果誰伍
遂遭鷲鳥嫌不得共廬處
昨者厲吻來軒然矜爪距
雌吟悲辛酸雄弱輒驚舉
羣卵無一完灑空血如縷
共居大化

中並屬飛鳴侶胡爲恣貪饕快意任誅取乃知媚嫉多
負才易遭侮豈無相愛人援引誰肺腑屈平感荃蓀杜
老傷蒿芎古也則有然吾悲劇辛楚亦欲訴鳳皇帝閭
詎蒙許悠悠宇宙內世路極深阻

鎮江守風

夜來朔吹何森森風吹海門愁太陰雨昏浪鳴翠蛟出
石塌穴改黃鼉吟我生何爲坐慘戚苦戀朝簪歸未得
城南尺五高會多誰識羈人淚橫臆

舟中詠八賢詩

漢淮陽太守汲長孺

吾欽汲淮陽嶽嶽神峰峙尙迂漢武皇肯阿張御史齋
閣任高眠瘴風差可喜不見蘇子瞻禍緣春睡美

漢河閒太守張平子

平子工研京文藻何秀拔一從綰郡符邈與京城闊悵
望青槐殿沈吟白獸闥徒詠四愁篇君門豈能達

晉始平太守阮仲容

樂理久失傳始平獨冥覺識高荀衛流秘通龍趙學紛
紜簿領閒素志違冲漠借問平靈尊何如竹林樂

晉永嘉太守謝靈運

靈運匪純士其才乃天人性乖違物忌志遠屬時屯嗟

哉世網狹麟鳳難庇身山居早歸去何事撶風塵

宋始安太守顏延年

陶公與顏公蘭茝實同世共抱曠達情豈忘經綸志時
運旣我違沈淪但狂醉不能媚要人豈免作外吏

梁新安太守任彥昇

朱昇旣怙權任公旋被黜一官瘴海還葛帔行慘慄廉
吏不可爲聞之古人述丈夫貴立名妻孥詎所恤

唐北海太守李泰和

李公如弦直忠確乃被誣冤深都亭瘞酷過巫陽呼干
年石室頌翠墨高璠璣土苴竟誰在嗟嗟彼譏夫

宋蘇州太守蘇子美

子美擅詩才迥然丹山鳳何哉飲食嫌微覺紛搆晚
營滄浪亭花竹恣游弄但見文醺娛何知避讒痛

夢亡兄

夢短長兮夢見驚連牀對語不分明那堪帳冷燈殘後
恰聽江南斷雁聲

聞粵東水災感賦

頻年嶺左困誅求又見長堤潰上游槌石早知庸帥誤
徒薪翻荷

聖人憂高城杉檜隨風拔絕岸鼃鼃入市浮聞道金錢

荔村草堂詩續鈔

十

頒少府稍欣春益到南州

滿目鴻嗷大澤呼連村多半入菱蘆沈沈苦霧張超市
慘慘流民鄭俠圖幾輩黃紬仍睡臥深妨白桿恣睢盱
路人痛憶朱巡撫綏定瘡痍近見無道光癸巳廣州大
公桂植親往西關勘災徒跣涉水
道遇縣丞呵殿來罰之長跪乃已

過揚州謁馮展雲中丞師卽承招飲賦呈一首

延津神龍劍會合蓋有神焉知廿年內復此蹤跡親憶
侍高要公猶是鰐鰕辰牙齒荷獎借感激懷孫甄公兮
實詞伯文藻輝彬璘

先帝昔御試數澤羅鳳麟會袁沈毛輩一一皆國珍撫

循責外吏賡和宣儒臣公時正侍從鳴玉拖長紳風流
冠寮列見謂儉喬倫十年事反覆虜騎生郊闔堅持汲
黯節恥拜安仁塵以茲坐長困溟漲無縱鱗徒聞滯華
省幾類吟江濱長安古大藩都邑更漢秦

特起領邊寄三輔熙陽春膠庠文學盛庇庶風俗醕咸
歌中牟魯願借河內恂青蠅忽誣玷羣吠多狂狴詆謫
肆污蟻毫髮成干鈞義存大臣體未忍爭斷斷歸臥蜀
岡前臨流岸幅巾尙時引躬責自恐辜

皇仁嗚呼鉤距輩炙手憑要津竊威類叢社正氣幾沈
淪終膺少卯戮宙合旋清新共驩旣貶黜元凱宜升掄

天高聽復遠此議誰當伸賤子昨行邁卸帆及清晨登
堂仰顏色誥訓何諄諄上懷宗社計下感誅求頻班荆
罕別語想見憂國眞問答乃未已高堂觴炙陳世途近
迫隘戶限成荆榛安知今夕會不遭流俗嗔丈夫感知
已肝鬲橫輪囷豈能媚權貴甘效駘駒馴獨慚朽木質
夙類飛蓬賓讀書未讀律何以蘇斯民霄漢忝通籍門
牆欣庇身幸尋論蒙作爲寄西南人

過金陵

重到金陵地江寒水自流無人知過客除是舊沙鷗

望晴川閣

萬柳碧成煙煙中人刺船舉首看畫棟似欲障青天朔
雁浮寒渚飢鳥下野田登臨自多感劫後此山川

南樓

薄酒不成醉浩然登古樓江山留勝蹟天地入清秋高
醺那能再昔賢不可求徘徊殊未已涼月下沙洲

泊鄧家口

燭滅燈殘夜氣清亂山銜月到牀明玉墀待漏今無分
獨對荒江數五更

讀王右軍傳

右軍誓墓時年齡猶壯歲一與懷祖乖幽栖遂忘世探

勝窮金庭留題徧蕭寺豈忘濟世艱審已知進退嗟余
薄祜人乖迂中時忌趙壹困阨隲屈平久憔悴先人昔
遺言經濟匪輕試但當作儒官慎勿求外吏十載痛蹉
跎出山負初志上慚玷門基慈訓虞顛墜下愧睹民艱
弱才荷邊寄雖蒙

浩蕩恩負乘恐貽累聞有葛稚川棄官昔長逝鐵橋何
蒼蒼深谷多松桂欲往從之游風濤渺南裔

登岳州城樓

目極江城萬戶煙艣聲帆影落尊前憑高便有無窮感
卻指長安落日邊

過洞庭遭颶風效玉川子體

東粵有一士束髮能文章平生傲睨多白眼
下視八極皆茫茫自從筮仕來作事逢角張
昨浮洞庭櫂擊楫從襄羊頗疑季秋節暖氣
蒸溽如探湯果然蓄極始一洩天維地軸翻
雷碾軒軒大鵬翥衙衙電鼉僵離離海馬駛
宛宛青蛟翔吹山欲平海欲竭況此高帆短楫
如蚊蟲黝然世界作純黑所未盡蔽惟湖光顛
翻震掉不許住意欲世外求深藏余乃執笏跪
顙而請曰下士宗浚再拜稽首言臣質實愚戇
所遭多艱屯不能媚朝列不能候權門致遭讒
慝口捷捷還幡幡

聖明實高遠或未知覆盆臣非薄外仕實慮辜
聖恩量才受職古所制敢使尸素乘高軒果蒙

璽書下俾貳滇中藩臣雖在江海戀

闕猶肫肫所期報

知遇拂袂歸田園胡爲躑躅此邦土盲風伏雨爭掀奔
豈其厄運坐磨蝎要使往殉彭咸魂戕戕天宇高厥聽
實具邇鑒此螻蟻誠不遺瑣與鄙爰乃命巫陽呼慶忌
召賈生迎屈子示以獄詞俾相料理或言彼讒人陰謀
過牛李蔽賢尙當誅况乃構萋斐宜毀崇羽誅俾共肆
朝市否則使宣室內召如賈生抑或俾商山隱淪逐黃

綺神聽似否否語汝勿煩憂凡諸罪譴重感召悉汝由
汝不見孔翠易來射獬獬終被幽良金賤躍冶美玉妨
暗投汝胡撻牢剔黜日不休風雲月露恣嘲弄海若被
覷山靈愁有如韓與孟雙鳥鳴啾啾爭喧破蛙黾騁怪
騰蛟蚪天公憐汝太狙獪故畀放逐來遐陬汝如在北
地槃敦交唱酬手調制氏磬響和虞賓球趨陪雲陛奏
韶濩上引姚姒參唐周鎬于服匿解辨識下逮瓦篆兼
敦牟貪奇嗜瑣百無厭日事豪奪還奸偷汝如在東極
挂席滄溟流六鼇釣得不稱意徑欲盡挾珊瑚鉤汝如
在南國投贈多朋儔壇坫互角逐山水窮雕鐫豪懷或

擊鶴樓碎散髮時逐陽阿遊朱明秘怪日露泄盜取局
鑰難藏收惟茲西徼絕邊地日月不與中原侔禹鞭罕
駐轡穆轍稀停軫窮鄉少雞犬仄徑多猿猴蝮蛇蟒蠱
立當路上有怪鳥鳴颺颺使汝意氣銷沮精神盪浮朝
愁夕歎淟忍包羞槁罄若餓隸枯拳猶纍囚誓將學龔
啞豈肯隨咿嘵仰承台司被穿鼻下對僚吏難伸頭口
呿舌繹坐摧抑詎暇諧諫如俳優再拜謝神言少年多
氣勝儼然等狂且欲與天公競昨非今始聞矯之貴崇
敬勿爲窮途悲通塞詎非命勉哉金人緘多福神所聽

泊常德府

輕舟溯常德迢遞似青天峽轉千家倚城開眾水懸鹽
茶通水估芋栗種山田應有涼風在桃源接目前

紅葉

已近飄零候文章世未驚向陽雖有意太豔轉無情絢
爛迷江國蕭疏綴驛程古來賢達士匿彩半蓬衡

寄季弟

中年病肺宦情關苦戀

君恩未挂冠萬里蕭條驚短晷一生漂泊抵危灘聽蛩
忽憶聯吟共聞雁方知寄信難爲問鄭公堤畔柳何時
容把釣魚竿

由常德溯流至桃源洞

鼓櫂出武陵羣峰定何似
倭儻千嬋娟洗頭對盆水
樹簪擢森捎蘿帶垂斐璽
潭渟浪陰深淺皆可喜
瀾嘯曳疏紋石潤涵細理
渙睢詎足方苔雪應莫比
孤臣墮南荒

君門隔萬里病骨委榛菅
騷魂感蘭芷賴茲漣涕痕
庶助游觀美推蓬且自娛
勿策風帆駛

桃源縣

午投桃源縣有盜聞刦人
公然攫金去白日穿城闐
嗚呼三楚士勇過成荆倫
驅除蚩尤霧再整黃圖新
武功

既云赫士氣亦未馴頗聞燒香聚煽誘如黃巾海隅况
多事應募乘風塵此曹陷虜陣未必皆致身椎埋乃慣
習毒與狂寇鄰沿江截估舶掠市搽奇珍烏能俾猘猯
盡化麒麟仁寄言牧民者慎勿征調頻必若弭邊患先
求民氣伸緬惟乾嘉中楊遇春李長庚饒經綸森然軍
令肅山岳同嶙峋奇材近稀覲悵望勞心神

紀夢

十月十一日沅江舟次夢陳丈古樵搽余故紙
籠得試帖詩一首謬加賞譽似是角蘭栗題余被擯於
世久矣而陳丈亦以謠諑方在里居關河雖殊

憂畏則一作詩奉寄聊志我憂

疾風飄蓬根浩蕩迷所向客子適遠途恆作還家想陳
公古循良是我丈人行雲霞標俊逸江海寄清宥憶昔
侍座隅謬蒙齒牙獎謂當崔蔡儕匪直王楊抗五年闊
音容杳絕尺書枉昨者魂夢交披襟若疇曩意深甫里
尋興同剡溪訪琅琅書篋閒餘韻劇清朗公今杜園居
薏苡受誣謗攜尊稀友朋擁篲卻令長青蠅紛垢污點
染旋滌盪揮毫工染皴嗜酒亦疏爽終全麋鹿姿杳爾
違世網浚也亦被讒遠浮瘴溪獎虞卿困窮愁趙壹甘
骯髒驅車古滇南闊遠辭仙仗驂騑絆異姿鸞鶴閔清

響凌兢乘波濤鬱悶視霄壤逢迎羞折腰論議怯抵掌
意疑九州寬邈絕鮮牙曠誰知恂恍閒乃復結眞賞品
題郭太榮容止嵇紹仰惜我負深期馳驅逐塵鞅明發
又危灘長風挾高浪石鈇攢戟矛天小入盆盎屈蟠蜺
蜒遊飛舞黿鼉王幽林况氛霾毒氣塞潏潏下爲將敵
岑上有欲落瘴常恐死道途朽骨殉魍魎湘水弔屈平
蘭陵老荀况未得返柴荆奚由撰屨杖錯羅朱鳥躔瀕
洞炎海漲歸歟覲殘生鬱結屢回望孤懷感誰同爰嘯
動青嶂

雁

平沙無際一聲涼
葭浦蘆洲正曉霜
莫怪日南消息斷
憐君只解到衡陽

魚網溪

溪旁有二峯插水中

仙人張石帆乘蹻忽然去
寥廓已高翔
靈根此留駐
勢干二曜昏
力抵萬濤怒
靈鼇或下肩
怪蟒恐中綢
青懸霜漬苔
黑倚雷劈樹
猙奇欲攫人
榜客屢回顧
愧無商邱術
豈免焦原懼
秉此忠信懷
潔絲靡渝
素涉險忘蹇
艱昭口隨垢遇

甕子洞灘

客懷多懽悽
觸賞暫怡悅
嘯風萬竅雄
掩日叢標闊
薄

霞午未昇遠見在木末
赭痕映篠蘿絳氣出杉
栝襍穢錯糾交爛熳若
堪掇陰崖忽吐暉
沍谷反噓熱怪哉蠻瘴
中冬暖氣恆泄幻此壤
采奇頓教旅愁豁尙憶
秘魔厓聯吟攀藤葛散
幘爭酣嬉題詩鑄峭嶮
撫景猶昨觀年華感飄
瞥

舟中夜雨

數點瀟瀟耳能傳天地
愁併將今古淚吹上去
來舟淒咽爰生笛蕭條
季子裘新晴方瞭翅浩
蕩羨沙鷗

辰州

山勢猙獰減波痕激濫
輕不勞津吏報知是近
江城

仙人巖

突嶺俯插岸穹巖深拒曦層巖鬱森挺削翠紛逶迤崖
傾乳竈滑礪絕浮梁敲魑魅不敢闢風雲無已時闐然
露方洞跡絕猿猱窺傳聞素書貯舊是松喬遺奢懷欲
恣覽梯陞攀欽峙羽陵詎緘怪宛委應探奇忽思嫺嫺
軸舊屬龍威司通靈久變化渴望空爾爲仙人今縱在
應亦淪謫悲不見弄麀輩領袖居鳳池何曾素書讀已
足爲帝師

白石崖

江行苦厭山巉絕盡青壁陡然素障橫芳巖近千尺潤

無沙土黏凜若雪霜逼皎皎類玉鑄皚皚疑粉白旁有
楓樹林映日半空赤駢垂似珊瑚愈顯純素色美此貞
潔姿蘊靈久稀覲未能貢玉堂充君礎與碣棄置雜荒
榛沈寢委蠻極人事類如斯臨風聊悵惜

銅灣曉行大霧

久客節候忘不知遠寒至起看川際煙濛濛似炊氣其
上爲谷雲繞樹相映帶黥痕紛漲空朔色勁增吹雨含
升墜痕風恣噏張勢青山嬾於人橫斜只高睡飄揚霜
霰酸僵仆澗谷閉迴首睇耀靈日車隔迢遞軋芴四極
昏纏連萬崖蔽深澤藏龍蛇空巖萃夔魑蠻荒已足悲

矧乃經窮歲願得九光枝餘暉徹幽翳

黃絲滾灘

石勢來如龍蜿蜒九州半其脊乃爲灘挾水日湍悍衙
衙牙鬚雄閃閃鱗甲亂盤渦終古轟高處凸成岸兀搖
孤根掀喧奪諸隘扞低疑帝維敲險訝鬼工冠崢嶸一
卷耳萬夫驚喘汗我思鴻濛初橐籥甫分判竇蠻隔中
原此地實橫限胡爲莊蹻流恣意鑿崖斷嗜利輕波濤
元氣始澆散近年境更奇泰西肆荒幻獠鬻匪近周大
秦竟通漢地球日廓增巧厯杳難算蛇豕恣眈眈卵育
恐終患帝醉胡不聞重昏幾時旦舉頭望蒼穹浩歌足

三歎

鷺鷥灘

安得千斛舟一旦生羽翼憑空馭氣行未用穿石隙我
來鷺鷥灘一折一斜直遠見紫氣橫中皆石棱積狹路
陰平攀大聲昆陽敵黑隨浪撐塘青見樹敲側彷彿天
柱頽虛無靈胥值迴看篙指痕寸寸皆血跡拏舟出坦
夷沽酒慰勞劇轉疑一綫危畏路始吾闢不然飢蛟淵
奪險豈人力遠聞驚波喧夜夢尙餘惕

黔陽舟次

臥疾黔陽瘴癘侵蕭蕭猿嘯出空林若非逐客千行淚

未必灘流爾許深

何事

何事鹽車困絕塵來牛去馬儻前因愁中山水都增恨
夢裏鄉園未算眞作郡但能驕路鬼歸田終擬誓江神
本來未是嵇康嬾惜此千秋有事身

得家書知庾生秋闈獲雋喜賦長句奉簡並寄盧

梓川甥

乃瀆

洞庭日夕多北風短檠三尺燈花紅朝來素鯉銜書至
書裏聞君初上第君才跋扈不可當龍池霹靂騰飛黃
如何歷塊乃屢蹶近始翦拂逢孫陽

文思天子開綸閣許鄭鴻儒被殊渥况兼蘭署多俊才
三鳳入龍參著作有詩幸勿歌鬱輪有策幸勿干平津
男兒知遇貴特達一日騁路凌青雲嗟余忝託苔岑契
西燕東勞巧相避方思掃徑待羊求豈謂離蹤感蘇李
湘山渺渺楓梧青上有雨雪元猿鳴思君不見徒屏營
滄波阻絕迷玉京手持蓍草欲相贈五雲樓閣空崢嶸
聞君覽勝多幽致走馬章臺時策騎酒榼憑教小史擎
筍輿定有門生備潭柘菴棗花寺我昔留題鑿巖翠醉
墨敲斜不成字君行一讀定淒然應惜羈人滯南裔吾
甥盧綸才絕殊眉閒黃氣今已舒爲言射策碧芸署勿

忘寄書青草湖

讀張禹傳有感

安昌畢竟是人豪經術羣誇馬孔曹誰料後來才更遜
驅除只合殺雞刀

大惡灘

茲灘以惡名畏路自終古若匪灘上行蛟龍孰予侮凌
兢入破舟八九陷水府譬登百仞梯又值萬鈞弩勢逾
鑿空奇力抵衝鋒苦距山妨後巉順溜指前武哀鳴地
爲愁側墮天盡俯長林况蕭慘日炙厯晨午噴泉色紺
藍極望似虻蠱嗟嗟大化中芸生盡羈旅栖鳥猶返巢

遊儵輒思渚物性戀故居人情怨離緒匪蒙

高厚恩詎肯涉斯土一奏武溪深長歌淚如雨

黃石灘

客感千萬緒客程千萬灘遙程有時到積感何時完
奇哉黃石下石勢叢叢攢水作逆飛雹風搖無定瀾其清
第漢涌其險逾海翻窳深匿阱窅叩動驚巖巒乃知鬼
神幻不許乾坤寬居人設樸汕累石殊鬱盤洄洄蓄泄
雨洶洶吟淒湍閭閻擅私利徒旅增愁歎獨有避讒客
興感忽無端人心實險阻行路良非難

途中望瀑布

草棘蒙茸棧閣敲泉紳歷落半空垂一條果似青山界
未信徐凝定惡詩

寶洞灘 俗名餓鬼灘

寶洞狹於洞怪石橫猙獰奇在石能語大聲塞噲吟岸
搖風更簸峽陷雷逾轟拘迫怒光上虛無哀籟縈淒淒
旅懷惡簌簌客淚傾靜思忽一悟破涕歡戚并往年羅
浮住飛瀑長琤琤灑然濯百慮若聽鈞天鳴胡爲此灘
上瑟縮神屢驚水聲豈有別無乃心所呈遇歡聽自愜
觸感悲旋生曷若姑置之無虧並無成冥然守雌牝外
物安能撓

泊舟玉屏縣河口復遇大風雨作歌

黔東驛路首玉屏山耶天耶同一青元冬日短來揚舲
斷霞燒空魚尾頰罡風忽作龍虬腥勢似掉尾從鯢溟
心知箕伯欲肆虐屏息跼伏循沙汀日車忽隱扶桑鉦
駢駢颯颯來巨霆羣山總隨鼇背上萬樹散作鷺毛輕
乾幽坤黑兩相軋彷彿助戰來百靈森輪盤轉幸未下
一下便恐崕峒傾少然疾雨篷溜鳴藤牀頓飽蘇宿醒
平沙溼堆霧市霧絕岸冷入冰崖冰同行二子共堅坐
瘦影淒淡依長檠戲猜雜謎射犴醬共鬪險韻聯彭亨
脫身危路自天幸癡人相惜斯恆情夜深靜臥百蟲絕

鐵衾坐擁猶魂驚忽然跨鶴來瑤京銀河櫛櫛浮空明
梅花十萬圍如城碎片飛墮青瑤觥遙聞古澗絕壁靜
似有玉局敲楸枰誰歟過者董雙成三花插髻吹鶯笙
問余不歸果胡以毋乃蟄伏同癡蠅醒來推枕心語口
寸念仙倪顏爲駢昌黎構訟太多事列子跨馭甯堪憑
人生何必萬釘帶且棄羈組還躬耕他時傳中述故事
知我早訂菟裘盟歸田不獨爲鱸膾厭此砵勺澎湃之
江聲作詩一笑滄波橫

由沅州溯鎮陽江諸灘作歌

湘灘險而駛粵灘險而深顛灘石氣連深沈昔年擊汰

愁我心巫灘峽灘亦奇絕歲晚風寒曾弭節今來黔灘
更阻艱水盡能飛石能活萬角鱗鱗驚流中開盤渦出
沒轉轂鳴雷我疑太白龍標兩死魄幻作急浪紛喧
不然鬼方古有伐留此崢嶸絕壁胡爲哉前者聳身如
猱顧後者鞠躬如蟻附一纜延緣罾崖樹進無寸步退
十尋失足便應同沒驚地形似逐灘低昂人命半憑灘
喜怒挂席昔羨孟浩然扣舷亦慕蘇髯仙自從涉險已
膽落徑欲打鼓催回船吁嗟乎天下灘流凡有幾行盡
諸灘今老矣秋來春去灘聲中每聽灘聲淚如洗獨羨
灘前張志和醉拍銅斗常高歌買魚得酒且盡醉日數

官船朝暮過

大王灘

羣川赴東溟百折久乃至時遇巨石橫悲吟動天地矧
茲行旅人安得常快意迴流指鎮陽束裝擬息憩復此
長灘橫寒日助淒厲石亂熊虎蹲水喧鶩鴨沸隱峽圻
有聲奔淙競無次晃閃浮龍鱗睚眦逆象鼻扁舟如聚
萍搖兀恐無蒂感彼長年徒短衣胔不蔽性命輕波濤
錐刀逐微利我輩亦何能鼎茵竊高位安得驅游民農
桑裕生計勿嗟行路難素餐內先愧

文德關

青天到黔小一綫橫微茫餘地皆羣山嶽岑勢開張其
狀或釜甑其尖猶劍鉞連肱列遠巘樹頰撐崇岡天公
不能限任彼低與昂脈絡無紀極日月迴厥光我欲躋
其顛矯首望故鄉越岡樹蕭瑟銅柱波飛揚朱崖屹鰲
背隱隱鄰扶桑豈不思遠涉關河阻無梁驚風忽吹鬢
零雨頻霑裳如何膺劇任戚戚偏慚傷遠遊令人瘦歡
樂甯久長

飛雲洞

層岡徧童顛霧樹忽相引微聞清梵音心知秀異蘊橋
通雙澗橫峽轉一崖盡昏巖疑巖津虛谷儼受牝雲霞

鬱扇暉日月，過紆軫林多。藍霏噓壑有，素雪質下臨。數
瀑泉撼地，聲殷嶺口遙。通湫穿迫狹，出谿窘詣勝。甫俗
捐懷新，驟疲奮沿隄。詩碣多戢戢，似束筍想見。權相來
供億，疲牧尹洞口有和珅詩榮華如過電，空受山靈哂。負暄出
陽阿，風色尙淒緊。暫憩非久栖，眞賞冀無悶。

夢瑞穀

冬山寒瘴高，冷月不到地。筠篁裊枯條，猿雁動哀唳。感
君情誼親，入夢遠相慰。君今已陳人，胡解到南裔。想應
馭風行，不悵路迢遞。我憶舊朋儕，幾人得快意。君也最
亨衢，亦灑楊朱淚。豈無新相知，謠詠屢憎忌。故友多泉

臺餘生足驚悸覺來囁語多苦道君姓字靈魂如有知
夜夜當入寐

別君已六年見君無一語鬱此欲訴情恐君相憶苦比
歲客京華貧與黔婁伍諸兒似阿通不解紙筆取獬犬
恣吠狴青蠅遭玷污一官墮蠻荒未遠脫簪組君聞應
代愁痛憤酸肺腑仕路多艱虞世途易齟齬勿羨達官
榮竊祿亦何補我欲一訪君蓉城渺延伫惟當返越臺
澆酒奠黃土特柯流滔滔懸恨終萬古

珠溜灣

峯亭湘上岑嶄鑿蜀中峽誰移向天南鬱作萬刃插飛

荔村草堂詩續鈔

三

梁中纒迴嘉樹外
匱帑渾涵無定根
瀑注有層級乍疑
灘叫譁遠共雲吐
納靈脈誰轉輸
混竅日闌鞞出山
甯爾心苦被俗情
狎渟澍敢質汚悲
嘯意不愜夏漲愁
沮如秋鳴助蕭颯
美人隔天涯乘雲
侍閭闔至音爲誰
操奮訴孰相答
援蘿憑青崖暮靄
忽回合悽神懍已
增歡與詎云洽

牟珠洞

窺岫晃翔陽遵途
踐溼雪鳥聲噤不
聞人影亦淒絕寺
門鬱穹窿石洞伏
摩谿誰移化人居
綴此萬松末無地
容雲栖有天閭石
缺履愁蛇霧霽衣
受虎風裂瓏瓏瓔

珞交太始孰凝結白垂兩眉深紺作千乳徹引臂修狄
橫袒肩應眞恬奔走諸村氓鼓鐘日吆喝我聞耆闍城
近已盛胡羯像設旣被焚靈蹤久消滅胡爲蠻洞中供
養尙芬潔宿緣想仍留法力猶未歇欲往問空王徘徊
望林樾

安平遇雪

客裏逢殘雪渾疑故國梅遙知蒲澗路亦有數枝開日
落愁征騎冰寒負酒杯

黔中驛路酒皆酸澀不可飲

何如歸卜築鋤

月闌蒿萊

石版房

養鷹妨脫條養馬利銜勒古來馭遠經首在播文德
裕陵昔臨朝鬼方阻重譯撻伐勞

遠謨氛雩久充斥觥觥西林公仗鉞秉謀畫民懷葛亮
仁寇憚王商色侵尋近百年又復煽蛟蜮蚩氓豈盡頑
恐或吏□□洪爐燎鴻毛元惡幸誅磔

皇輿廓再清純繪來奉職昨過石版房蠻村聚千百銀
燭耀晶光布裙垂姬嬙他族爾無滋耕鑿幸努力上有
帝軒農下有臣契益前車鑒匪遙螳臂豈能敵乾坤正
清夷勿弄潢池戟

途中雜詠十首

荒村

亂後邑市改歸然留此村神鴉朝噪社猛虎夜夔藩陋
俗成夷犵誰家贍子孫絕憐甘冒禁鶯粟滿畦繁

故壘

故壘蕭蕭冷當年此潔蠻碑題訛缺後垣堞有無閒仄
徑稀人問斜陽只鳥還莽蜂妨有毒愁患願思艱

廢畦

墾荒頻下令此地尙榛蕪豈乏人扶耒都愁吏責逋苔
蘋生故瀆蓬蘽塞平途爲語紆民困先除卜大夫

破屋

亦在乾坤內何嘗異畫堂破牆朝浥雨斷瓦夜留霜應
有孤寒客高歌獨寐章思之求未見搔首極蒼茫

古祠

琳宮昔魏煥今日徧荒榛奠拜稀巫覡衰興閤鬼神蠹
蛸懸玉座苔蘚上金身莫煽狐鳴幻耕犁俗漸馴

怪石

第論形瘦皺何必滅仇池荒裔看長老多才世未知黜
痕捫蘚口黑氣入蛟螭莫被奇章見千夫輦運疲

疲馬

神駿豈輕覲半多才下中祇求勝任負何必定驍雄苗

猓戈鋌息滇黔市易通未須愁突陣努力陟蠶叢

寒鴉

憐汝依宮禁曾陪早暮朝卽今來遠徼苦被雪霜飄短
翮臨風斂歸心向日遙任教鷹隼忌高舉已雲霄

斷碑

但讀貞珉字龔黃盛此時鋪張文士筆鳩斂小民貲時
代豈云遠姓名多已遺石碑如解語應稍別澠淄

病樹

枵腹偏何物猶承天地春庇人知乏用栖魅或能神牽
引藤蘿密潛藏鼠蝠鄰芟夷同惡竹休使據要津

黃角樹

山徑苦漫平得泉勢乃活入山渾厭山砭耳頓清澈初
奔爲湖瀦直瀉若雷掣巖巒屯曠陰日月避飛沫凌危
下虛無蓄憤爭注洩靈胚竟誰開太始孰窮詰或云珍
珠拋驪龍此窟穴或云海眼通崩灌日不竭否則氣母
含雲腴貯芬冽仙人來酌瓢漱齒勝嫌雪忽思黔地貧
氓庶厭糠粃小吏肆誅求寡妻目流血安得挽此泉頓
化金玉窟慰彼蚩蚩氓一朝蘇涸轍水利近罕求污萊
孰耕塋非無論蒙書文具殆虛設召杜匪難希臨風企
來哲

道旁見野花璀璨可愛

黔中天暖雪來遲凍後陳英尙暗滋自有凌冬顏色在
向來沒骨薄徐熙

郎岱道中

一徑上蒼煙人行似倒懸馬頭惟絕磴鳥背已青天側
想洪荒始誰人鑿空先纍纍崖下首風雨泣淒然

半坡塘

坡陀一何深百折竟未已俯臨石有隙直視壑無底意
疑地府鄰豈有再轉理誰知下嶺顛正接上峰趾盤盤
側步行出入細如蟻駕空疑挾仙啖影每妨鬼足凌片

雲輕背倚萬峰時鄙人遭屯遭何適非困否牢騷徒自
危呼籲正難恃以茲悟達生嗔怖亦不起寄言愴卞流
裂眦漫相視稍報

明主恩行將謝泥滓

上寨驛

黔民多穴處面目如枯鱗采煤萬峰頂躡險緣階梯盡
日不盈擔價賤如塗泥近儒侈富國算測宗泰西開礦
乃大政利與鹽鐵齊苗疆縱僻遠豈乏璧與珪鵲斑及
犀點峒戶爭提攜惜哉陸運遠險徑難攀躋遂令洋舶
恣擁利盈朱提願乞天公惠憫此烝與黎貨殖俾饒富

水陸容遠齋庶覩宇縣康稍拯飢寒僝停車及茲里日
瘦氣懣懣至寶乃棄地破竈生蒿藜奈何尙責稅老穉
頻酸嘶

初入滇界

黔山盡處疑天盡忽轉羣山路一條遠望層岡鵬翼展
漸多平路馬蹏驕寒雲尙自依殘壘古木端難問往朝
臥聽麗譙鈴櫓靜喜看邊徼已塵銷

抵平彝作

荒城如壞玦斜挂亂山中崩堞餘泥紫高林積瘴紅燈
稀知驛小酒賤想年豐康濟愁無策慚看竹馬僮

荔村草堂詩續鈔

三

晤施濟航太守前輩

之博君由翰林出
守曲靖時亦有歸志

溝水東西有別離人間何處不參差
那堪聽鼓鈴轅日轉憶簪毫粉署時
來日大難拌共醉我曹相惜恐成癡
燈前各灑思鄉淚但訂歸期總有期

盤龍江

禹王不作李冰死誰遣江流環柱城
始識古人多偉績至今利賴徧編氓
連畦處處呼犍響臨水家家放鴨聲
默聽樹根耆舊說漸看風景似承平

小桃

春風等萬物偏到小桃先獨立
亭亭秀宛如新嫁年香

銷風雨外色逞蝶蜂邊不必撩人意垂垂自可憐

署中海棠殆百年物花時醺集其下作歌

平生五嶽稀遊跡獨有看花興殊劇北遊燕薊西峨岷
半與海棠舊相識滇中一樹稱獨奇磊磊當檐近千尺
風迴纚纚挹鳳毛雨綴翹翹聳雞幘憶昔川南攜種歸
輦運奔馳百夫力踰淮化枳古有云瘴雨蠻煙栽不得
我今正是天涯人亦似陳根忽移植流連光景或足娛
拋撇鄉園真可惜一杯敬酌向花神終擬抽簪傍泉石
今年爛熳且盡開明歲蕭條會相憶

止菴偕幕中諸子夜坐聽雨

今年苦多風飛沙走平陸零吁致土龍崇禴藉巫祝果
然淅淅鳴奔迸挾飛瀑想見園圃閒蕭疏潤松竹獨惜
襤被寒漏痕遞相續誰知達官衙乃類窶人屋平生負
經綸小試任伯牧徒鬱九州才不庇一椽足經營藉牽
茅匿笑及僮僕回頭問杜陵大廈幾時築

侵晨津吏報築堰皆成渠匪惟利灌溉亦足供轉輸新
苗幸已長嘉穀日多儲父老極歡摯行歌樂有餘翻憶
在田里未親犁與鋤豈知臨絕徼驟跨雞栖車亦思究
水利舌繲恆躊躇始知經濟學莫過耕田夫四體苟不
勤何以慰辛劬古來治國策卽出齊民書

嘗羨東坡翁瓊儋屢遷謫蠻村桂醕斟萬戶靄春色我
今六詔行市酒兼金值攢眉幸未嘗螯口劇荆棘塊獨
誰與娛沈吟或終夕賴此簷溜鳴迸作珠璣滴何殊憩
羅浮洗耳臥泉石人生貴自娛適意無南北但願年屢
豐何愁一身瘠

偕諸子紫薇花下飲

飲酒何必步兵廚看花何必洛陽陌但逢花下便提壺
一醉一吟殊自適亭亭紫薇花蔭我中庭前虬枝虺幹
蒼而堅玲瓏殿麗現寶相遠若絳氣橫青天高者凌霄
森崖巒下者依檐尙騰攫赤霧沈沈紛噴薄怪鳥小禽

不敢啄初疑赤帝乘鸞車閃爍飛下崑山霞或云滇中
古佛國天女徧散陀羅花填坑滿谷盡錦繡要使土地
成光華主人宴客開羅幕萬萼玲瓏照深酌低頭呷酒
酒口翻爲有奇香沁杯勺舉觴忽酌紅羅仙上清淪謫
今幾年古來綰綬凡百輩誰爲清濁誰愚賢李志曹蜍
定何物意者但逐黃紬眠而我骯髒亦可憐賜書未見
雲章編遠辭玉堂抵金齒與花或者前生緣憶昔□□
□□□崇棟華棖盡荆棘定光山茶今已無黑寺唐梅
非舊植臨風三顙欲徘徊□□芳姿亦殊得酒盡螭頭
雙玉壺脫幘袒跣相號呼此花穠麗南中無盡共繞樹

爲歡娛丈夫生世貴作健屈賈憔悴非吾徒君不見晚
來城頭烏畢逋礮車雲起深模糊清景一失難再摹眼
前相遇且盡興莫待碎瓣荒苔鋪

署中多鷺鷥夜唳甚急

夜聞鷺鷥鳴樹杪霜霧沈沈天未曉憐渠前世定勞人
苦向塵寰頻擾擾憶從珥筆光明宮三山宮闕雲錦重
唳鴉垂柳金溝路今日迴思似夢中

丙戌除夕

年年歲盡驚將老況坐窮邊宿願違破署獨居魂易怯
故鄉難到夢先歸悶焚艾菝爐香減醉擁襜褕酒力微

獨有丹心逾昔壯往來時傍五雲飛

海心亭小坐

潭光與天影似欲占全城日爍芰荷氣風傳鳬雁聲句
教羣吏續禪共老僧盟卽此銷塵想何須更濯纓

輓龐省三方伯前輩

際雲

神羊獨鶚見斯人歸旆旋驚瘴海濱白馬流蘇悲遠殯
碧雞荒裔殉孤臣曾營陽羨心應慰

君卜居揚州

便作閩羅

事儻真

君卒時或傳爲真官

愧荷知交期許厚此生敢厭庾郎貧

君初見余泛泛而已後稍聞余節操嘗謂余曰足下演
中第一清白吏也曩但以文人目之幾失之交臂矣

昇真

曾隸淮南號一峰昇真略與犬雞同登壇不說參同旨
只詡龍堂破陣功

懽悻修文紫府郎珊珊瑣骨嚙霞漿玉京近要朝參早
策鳳鞭鸞隊隊忙

廣成高坐鎮蓬瀛叱咤鈴符百鬼驚豈意琳宮容易進
餓夫凡隸總門生

竊藥雙成妄自矜親聞天語示丁甯須知朱鳥窗扉外
窺伺何曾任歲星

青童校籍定何如升黜居然有轉除見說不煩功德滿
只憑鳥使兩行書

文武爐開火候新相看寶井出金銀如何狡獪鍾離意
不見飛章達帝晨

玉几山前記姓陳忽辭市僧附羣真得昇碧落非容易
曾向花宮泥首頻

天門詆蕩鬱蕭堂嘯聚偏來九首鵠見說騰真多別路
只須月斧借吳剛

誰得元皇喜怒心守廚謫溷頓升沈可憐掣電奔雷手
也藉王陽解鑄金

仙苑居然亦忿爭豈徒鬪草較輸贏瓊田十頃麻姑業
便有獮龍欲占耕

聘錢賒欠日啁啾孤負情高住玉樓賴有釣鰲江上客
不隨波浪逐東流

縑車會上聞風顛小住紅塵漫乞憐舊識玉皇香案吏
肯教頻遞衍波箋

嬾從王屋別移家歸訪羅浮萼綠華莫問丹砂成就否
但騎啞虎傍梅花

題陳衡山梧月山館圖

落葉已蕭槭况兼庭月斜黔陽秋萬點一半在君家窮
巷絕宵櫺高城聞暮笳遣愁定何物除是讀南華

題史繩之方伯

念祖

僧牕聽雨圖

伊昔

顯皇初御宇赭寇妖氛滿吳楚邗溝南北更堪憐玉樹
瓊花徧焦土史侯華胄尙書孫獨抱卷冊棲衡門書聲
琅琅阿兄共餘暇洗腆羞晨昏平山堂下紅橋路盡日
瀟瀟雨如注但愛燒燈榻畔談豈知飛礮江頭怒廿載
風塵反掌論旋傾東海洗乾坤壯歲鞭絲各行役早年
釣石知誰存顧生頭白江南客爲君寫圖紀陳跡遙知
溟皖兩衙齋各對長檠苦相憶史侯史侯才軼羣殺賊
曾殪鴉兒軍肘後金印何足云方今
聖人承華勛六幕澄鏡銷海氛君兮八州會兼督豈合

遠憶山中雲轉思豺虎縱橫日海宇澄清苦難必方愁
竄伏易化離豈料生還更促膝願君長憶在莒時永念
鵠原靡相失嗟余少跳盪綴學難精專亦經島夷亂亦
值荒札年當時挾冊偕惠連手值喬木今參天昨者附
書至問我胡遷延頭綱入餅諒無分曷不搥鼓催回船
君當競爽開戎旃我願歸釣槎頭鯪鐘鼎山林各殊致
夢魂它日可以相周旋

讀宋芷灣詩集

六千里外饒吟興二百年來此異才大抵勝遊皆我似
獨憐生面讓君開波濤奇譎同蘇海雲雨荒唐軼楚臺

莫等橫流滄海盡要須筆力萬牛迴

再題陳衡山梧月山館圖

千古逢秋客多沿宋玉悲豈知閒曠境正在次寥時疏
樹影成格冷蛩吟和詩據梧當此夕夢與葛懷期

題王孝廉

德環

寒牕夜織圖

唧唧復唧唧姑婦當牕織天寒輶瘵愁無禱盡日繅絲
不盈尺兒讀書慰阿姑兒不讀書母痛呼問兒學業近
何似曾誦范滂佳傳無病羽不長飢貞柯不終悴兒倖
讀書登上第阿兒燁掌十年功阿母填胸萬行淚人生
騰達會有期卽看萊綵承娛嬉爲言珠翠長榮照莫忘

寒窗夜織時

將解任回粵繩之方伯有詩慰留卽次原韻奉謝
故鄉蓴菜漸西風屈指歸期慰素衷避俗暫辭題鳳客
養真聊學祝雞翁到官本作休官計去國甯妨報國忠
慚愧故人期許意野鷗何敢匹霄鴻

雞蟲得失等浮漚拔劍悲歌動四愁世味久同翻覆雨
宦途空歷去來郵恥糜廩祿千鍾粟愛泛滄溟一葉舟
它日閉門君亦羨著書猶得禮堂留

登大觀樓

填胸壯氣鬱飛蟠獨對秋光靜倚闌百戰驚餘仍傑構

九州行盡此奇觀
漁舟點點銜波少
叢荻荒荒戰雨寒
歸向虎門臺上望
此江源委得全看

衙齋

衙齋蕭寂甚
渾似在巖阿
握手竹如意
隱身松養和
客來嘯鳥報
吏散落花多
喜見豐年象
衙衢擊壤歌

陳圓圓小像陳蘭卿太守

鵲屬題

早日平康負盛名
晚耽禪悅悟無生
紅顏自是知幾早
絕勝流離孔四貞

老淟風流晚自娛
後庭鬪草共羣姝
不知步輦偕遊日
曾過金禪寺也無

塵世滄桑一局悲休將入道笑蛾眉君看遺老熊

開元

金

堡

輩都學逃禪雪竇師

鸞影商山已渺然荒墳聞賸草芊芊恨無好事陳髯令
卻爲河東表墓田

送人入蜀

折柳與君別君行何日還成都千萬柳一半我曾攀此
去偶登眺相思應解顏明年飛絮後吾亦返鄉關

臬署旁豐園有竹石之勝余久不至其地偶雨後

獨行得詩二首

紅蕖粉黛二八女修竹旂旌十萬夫共怨使君迷悶甚

秋來三徑履綦無

牆角小亭未有名枯腸摸索倍愁生眼明忽見陬山色

合配青神借景亭

山谷有青神借景亭詩

王悔生先生

灼

望雲圖令孫季宣司馬

燾

屬題

白雲一片爾何來其根乃自崆峒之麓滄江之湄如困
如蓋如縞帶爲麟爲鳳爲蹲獅迴風忽吹競散落八荒
四極窮奔馳問誰控馭去古來惟有羨門與安期朝遊
閩風夕元圃凌虛澶漫隨所之人生安得如雲易騰蹕
東西南北永永無別離皖東有王君至孝顏閔期孝子
能文章又復能歌詩凡可致親喜竭蹶無不爲時或潔

饌進時或萊衣披生不願五侯之鱗萬釘帶但願高堂
鞠脰色笑如嬰兒孝子之孝誰等夷一朝吏檄至乘鐸
東流陲孝子意色驚動心嗟咨欲留苦敦促欲去旋遲
遲廣文官舍去家僅百里孝子視之乃等海角還天涯
當其束裝日慘慘不可支朝望雲雲披披夕望雲雲垂
垂望之見親舍喜色浮雙眉宛然見高堂夕寢而晨炊
望之不見垂涕洟仰天四顧長吁唏我知畫工筆能貌
孝子之狀跼蹐而躑跼不能貌出孝子心鬱伊孝子到
官來琴鶴書畫隨孝子謝官去扁舟一葉微風吹人間
孝子何事果汲汲但視雲氣負遠難攀追還家又幾載

侍奉神怡怡上堂奉母千萬壽蓬髮虎齒精爽長勿衰
孝子之孝誰等夷作者赭寇亂千里張旌旗吳回□□
赤熒怒劫火飛燄昆明池帝曰孝子之孝誰等夷毋令
所繪圖煙滅而冰漸動令六丁下視八神護持俾其子
孫守遠勝金玉貲時時寶氣作騰躍虹采上燭東南維
孝子賢孫示我此圖淚下如縷縻凡今之人天性日薄
倫常或虧溫嶠忘親太□□李定棄母羣詬訾水源木
本奚可漓盍奉孝子爲模爲臬爲繩規但令母慈子孝
和氣日洋溢劫運定挽蛇與豨孝子今已歿或應乘雲
馭氣從雙螭披圖再三拜想見孝子一日之痛千年悲

白雲有時散孝子之心無盡期人亦有言陟岵之詩可
教孝凡爲人子讀斯圖者當知之

荔村草堂詩續鈔終

先君手定荔村草堂詩鈔凡分八集集各系年至光緒
甲申而止改官滇南以後諸作尙未編定迨戊子先君
棄養後凡經寫定各稿已次第校刊任復檢拾遺編錄
成此卷原書有字畫不能辨識者暫爲闕出不敢妄以
己意增改痛維先君以不樂外任致損天年其鬱伊牢
落之概一於詩寓之雖此卷未經先君手定然數年心
力所萃恐久而湮沒也比年旅食京師趨曹之暇謹爲
編次付之剞劂念析薪之難荷嗟歲月之不居每一展
卷悲從中來已宣統二年九月孤祖任謹識